

Gvangjsih Minzcuz Bau

Cawjguenj: Gvangjsih Bouxcuengh Swcigh Minzcuz Cunghgyau Swvu Veijyenzei

Cawjbanh: Gvangjsih Minzcuz Bause

Geiz neix 8 banj

广西民族报 Aenhauh okbanj: CN45-0036 B.2024 Nd.10 Ng.30 Liggaeuq gyapsaenz nienz ndwengouj ngeihbet Geizsoq: Gungh daih 3643 geiz

《Siz Ginbingz Lwnhgangj Cungguk Cangqheiq Yaebbien》Okbanj Fathengz

Sinhvazse Baekging 10 nyied 27 hauh dien Cek saw 《Siz Ginbingz Lwnhgangj Cungguk Cangqheiq Yaebbien》Cunghgung Cunghyangh Dangjsij Caeuq Vwnzyen Yenzgiuyen bien haenx, mboengq-neix youz Cunghyangh Vwnzyen Cuzbanjse okbanj, youq daengx guk fathengz.

Bouxminz cangqheiq dwg gij biu youqgaenj sevei cuji yendaiva. Cibbet Daih Dangj doxdaeuj, Dangj-cunghyangh aeu Siz Ginbingz dungzci

guh goek de dingj aeu bouxminz guhdaeuz, sengmingh guhdaeuz, aeu baujgang bouxminz cangqheiq cuengq youq aen canloz diegvih hwngfat gonq, dingj diuzroen veiswng caeuq cangqheiq hwngfat miz daegsaek Cungguk, dinghlaeb gij fuengcim guhhong veiswng caeuq cangqheiq seizdaih moq, cienzmienh doicaenh hwnqguh Cungguk cangqheiq, haeuj-laeg gajgwz yihoz veiswng dijhi, hwnqbaenz aen yihliuz veiswng dijhi gwnz seiqgyaiq gveihmoz ceiq hung,

laebcaez aen gunghgung veiswng fuzvu dijhi cienzdoh singz mbanj, guk raeuz bouxminz cangqheiq suijsingz daezsang yienhda. Siz Ginbingz dungzci hopheux hwnqguh Cungguk cangqheiq fatbiuj baenzroix lwnhgangj youqgaenj, laeb'eiq laeg-gyae, neihanz lai raeuh, ngeixnaemj laegdaeuz, doiq doidoengh seizdaih moq guk raeuz veiswng caeuq cangqheiq saehnieb hwngfat, roengz giek maenhsaed hawj cienzmienh doicaenh hwnqguh aen guk ak miz gij

yendaiva yiengh Cungguk, gij saehnieb minzcuz fukhwng, miz yiyouqgaenj.

《Lwnhgangj Yaebbien》faen 10 aen ciendaez, gungh 292 duenh lwnhgangj, daj gij baugau, gangjavah, damzvah, ciswz, sawsaenq, cijsi, baevah daengj 140 lai bien vwnzyen youqgaenj mboengq 2012 nienz 11 nyied daengz 2024 nienz 9 nyied Siz Ginbingz dungzci yaeb'aeu. Ndawde miz mbanj lwnhgangj dwg baez nduj goenghai fatbiuj.



Lingzyinz Yen Sahlij Yauzcuz Yangh Banh Laebbaenz 40 Hopbi Angqhoh Hozdung

Bonjbauq siusik(gicej Cau Dwzfeih) 10 nyied 25 hauh, Lingzyinz Yen Sahlij Yauzcuz Yangh banh laebbaenz 40 hopbi angqhoh hozdung. Mwh yienjheiq, 《Fwen Louzhiek Bunuj》《Mbanjyauz Bienq Yiengh Moq》《Dwkndaengq》daengj cezmuz miz daegsaek minzcuz doxlwnz hwnj daiz yienj, langhbaij le Sahlij Yauzcuz Yangh gak cuz vwnlai maqmuengh caeuq gyaepgouz gvaq ngoenzndei. Yienhciegz yienjheiq ndei-yawj, bouxyawj dopfwngz haenh ndei. Ndaw doz dwg bouxyienj youq gwnz daiz ciengq go diuq foux.

Bak Bi Gveicouh Banjveh Cunzyouz Langhbaij Youq Nanzningz Haiguh

Bonjbauq siusik(gicej Veiz Yingjcinh Cangh Sinhyiz) 10 nyied 23 hauh, “gauhyenz lai saek • rizsienq seizgan—bak bi Gveicouh banjveh cunzyouz langhbaij” (camh Nanzningz) youq Gvangjsih Minzcuz Bozvuzgvanz haimuq.

Baez langhbaij neix youz Guegya Yisuz Gihginh Gvanjlj Cunghsinh cijdauj, youz Gveicouh Swfhfan Yozyen, Gvangjsih Minzcuz Bozvuzgvanz, Gveicouh Swngj Minzcuz Bozvuzgvanz cawjbanh, Gveicouh Meijsuzgvanz, Cunhyi Si Meijsuzgvanz,

Cangzsah Swfhfan Yozyen Meijsuzgvanz, Swconh Swngj Meijsuzgvanz lienzhab ciepbanh. Muzdiz dwg doenggvaq langhbaij banjveh cozbini minzcuz daezcaiz Gveicouh bak bi doxdaeuj okdaeuj, hawj bouxyawj roxyinh gij minzcuz vwnzva caeuq gij cingsaenz minzcuz doxgiet ndawde hamz miz de, coicaenh gak minzcuz vwnzva doxgyau caeuq roxyiuj, doidoengh swncienz caeuq hwngfat gij vwnzva ciuhgeq maenhndei minzcuz Cungguk.

Baezneix gungh langhbaij cozbini

100 fuk, faen baenz “riuzhaeuj daengz hwnghwnj” “caprag daengz baenzsug” “baihsae daengz baihnaj” “hoengh-vuengh daengz hwngfat” seiq aen cawjdaeuz, langhbaij yaek guh daengz 2025 nienz 1 nyied 5 hauh.

Haimuqsik le, lij guh yozsuz yenzdaujve cawjdaeuz dwg “gij gvanhaeh lizsij banjveh Gveicouh bak bi caeuq gij eiqsik caezcaemh Cunghvaz Minzcuz”, gak dieg yisuzgyah yaenglwnh le gij fuengyiengq banjveh coglaeng hwngfat, caeuq baenzlawz swncienz caeuq doigvangq

ndei banjveh vwnzva doengzseiz, caenh'itbough giengzvaq gij eiqsik caezcaemh Cunghvaz Minzcuz, doidoengh vwnzva hwngfat hoengh-vuengh, coicaenh vwnzva gagsaenq caeuq minzcuz doxgiet.

Ciuq cam rox, banjveh yisuz dwg cungj yisuz biujyienh hingzsik youqgaenj ndeu, itloh doxdaeuj youq Cungguk yisuzgai miz diegvih daegbied, de aeu sienqdiuz, saek daengj yenzsu lwnh yisuzgyah guhlawz ngeixnaemj ndwenngoenz, vwnzva caeuq seizdaih, miz vwnzva neihanz caeuq yisuz gyaciz lai raeuh.